



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA PËR MBROJTJEN E TË DHËNAVE PERSONALE

Nr. 162 / Prot.
5

Tiranë më 17.07.2020

REKOMANDIM

Nr. 14, datë 17.07.2020

PËR KONTROLLUESIN “*FEDERATA SINDIKALE E PUNONJËSVE TË
INDUSTRIË SË SHQIPËRISË*” (FSPISH)

Në mbështetje të neneve 29, 30 dhe 32 të ligjit nr. 9887, datë 10.03.2008 “*Për mbrojtjen e të dhënave personale*” i ndryshuar (në vijim “*Ligji*”), ligjit nr. 44/2015 “*Kodi i Procedurave Administrative të Republikës së Shqipërisë*” (në vijim “*Kodi i Procedurave Administrative*”), procesverbalit të hetimit administrativ dhe provave të administruara në ngarkim të kontrolluesit “*Federata Sindikale e Punonjësve të Industrisë së Shqipërisë*”,

KONSTATOVA SE:

Në zbatim të Urdhrit nr. 25 datë 11.02.2020 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit Federata Sindikale e Punonjësve të Industrisë së Shqipërisë (në vijim, “*Kontrolluesi*”), me objekt:

- Verifikimi i ankesave të paraqitura pranë Zyrës së Komisionerit nga disa qytetarë si dhe zbatimi i ligjit nr.9887 datë 10.03.2008 “*Për mbrojtjen e të dhënave personale*”, i ndryshuar dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale.

Hetimi administrativ, pranë kontrolluesit, u fokusua në:

- (i) trajtimin e ankesave të paraqitura pranë Zyrës së Komisionerit nga disa subjekte të të dhënave personale, të cilët pretendonin se Kontrolluesi kishte publikuar në llogarinë e tij në rrjetin shoqëror “*facebook*”, listpagesat me të dhënat e tyre personale, pa marrë më parë pëlqimin e këtyre të fundit, në kundërshtim me parashikimet e Ligjit; dhe

- (ii) verifikimin e ligjshmërisë së përpunimit të të dhënave personale nga Kontrolluesi, gjatë ushtrimit të veprimtarisë së tij.

Zyra e Komisionerit, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit, vëren se:

1. Kontrolluesi ka publikuar në llogarinë e tij në rrjetin shoqëror "facebook", më datë 11.01.2020, ora 16:31, fotografi të disa listëpagesave, të cilat përmbajnë të dhëna personale të disa ish-punonjësve të shoqërisë "Albchrome" SHA, të tilla si: emër, mbiemër, paga bruto dhe neto për secilin prej tyre (për vitet 2016-2019).
2. Kontrolluesi, ka bërë një publikim të dytë më datë 13.01.2020, ora 11:11, që përmban të dhëna për pagën bruto dhe neto për vitet 2016-2017, të dy ish-punonjësve të tjerë të shoqërisë "Albchrome" SHA. Këto publikime kanë vijuar më datë 14.01.2020, ora 11.58, për të dhëna rreth pagës bruto dhe neto për periudhën 2016-2019, për një ish-punonjës tjetër të shoqërisë "Albchrome" SHA (i cili është ankues). Ndërkohë, publikimi i fundit i bërë, rezultoi ai i datës 16.01.2020, ora 11:11, për të dhëna rreth pagës bruto dhe neto për vitin 2019, të disa ish-punonjësve të shoqërisë "Albchrome" SHA.

Zyra e Komisionerit vlerëson se, publikimi i të dhënave personale nga ana e Kontrolluesit përbën shkelje, pasi konsiderohet përhapje e paligjshme e të dhënave personale, në kundërshtim me detyrimet e parashikuara në nenet 5 dhe 6, të Ligjit.

3. Provat e paraqitura nga ana e Kontrolluesit nuk vërtetojnë plotësimin e kriterëve ligjorë të përpunimit, në kuadër të legjitimitetit të përhapjes së të dhënave personale në lidhje me marrjen e pëlqimit paraprak të subjekteve të të dhënave, në kundërshtim me parashikimet e nenit 6, të Ligjit.

Zyra e Komisionerit vlerëson se, marrja e pëlqimit është e vetmja mundësi ligjore e kontrolluesit, referuar germës a), të pikës 1, të nenit 6, të Ligjit për të legjitimuar përpunimin e të dhënave personale. Pëlqimi, në bazë të pikës 24, të nenit 3, të Ligjit duhet të jetë në formën e një deklaratë me shkrim, i dhënë shprehimisht me vullnet të plotë e të lirë nga subjekti i të dhënave, duke qenë në dijeni të plotë për arsyen pse të dhënat do të përpunohen, çfarë nënkupton se subjekti i të dhënave pranon që të dhënat e tij të përpunohen.

Për sa kohë Kontrolluesi nuk ka mundur të provojë ekzistencën e pëlqimit të ankuesit për publikimin e të dhënave të tij, vlerësojmë se përpunimi i të dhënave cenon edhe parimin e sanksionuar në germën a), të pikës 1, të nenit 5, të Ligjit.

Në përfundim të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin përkatës.

Zyra e Komisionerit vlerëson bashkëpunimin e Kontrolluesit me grupin e hetimit administrativ dhe reagimin e tij për rikuperimin e shkeljeve të konstatuara. Plotësimi i këtyre detyrimeve nga ana e Kontrolluesit është mjaft i rëndësishëm, pasi garanton

përpunimin e ligjshëm, sigurinë e të dhënave personale dhe ndalon mundësinë e përhapjes së tyre në mënyrë të paligjshme.

Sa më sipër, në zbatim të neneve 5, 6, 29, 30, 31 (pika 1, germa "a/1"), si dhe 32 të Ligjit,

REKOMANDOJ:

1. Kontrolluesi "*Federata Sindikale e Punonjësve të Industrisë së Shqipërisë*", të realizojë në mënyrë të menjëhershme fshirjen e të dhënave personale të ankuesve dhe personave të tjerë, të dhënat e të cilëve janë publikuar në llogarinë e tij në rrjetin shoqëror "*facebook*", si dhe çdo platformë tjetër të kësaj natyre;
2. Në zbatim të pikës 1, të nenit 32, të Ligjit, ky detyrim të përmbushet menjëherë.

Afati fillon nga data e marrjes dijeni të këtij akti.

3. Kontrolluesi të njoftojë Komisionerin për masat e marra.

Në rast mospërmbushjeje të detyrimeve të parashikuara në këtë akt, Komisioneri vepron sipas pikës 2, të nenit 30 dhe nenit 39, të Ligjit, të cilët parashikojnë se në rast shkeljesh serioze, të përsëritura ose të qëllimshme të Ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, Komisioneri vendos sanksione administrative për kundërvajtjet administrative përkatëse dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 17.07.2020.

KOMISIONERI

Besnik Dervishi

